



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma : Tir Yimym

tiryimym@aolima

tir yimym

TAPAK 8

Linük nung shisaliok aser medical facilities tajung nungdak: Atishi

AFC Champions League nung Neymar India nung asayatsü imlar



VOL. XX NO. 313 (ADOK 313) DIMAPUR ROGONÜ (FRIDAY)

LUROI (AUGUST) 25, 2023

₹ 5.00

NST Department nung inyaker ka ISBT Dimapur nung tepseta liasü

Dimapur, Luroi/August 24 (TYO): Dimapur Police sangdong ka ajanga ashiba agi, August 24, 2023 anepdang 7:00 ako meta ISBT Complex, Purana Bazar, Dimapur nung nisung tasü mang ka nguteta liasü.

Iba nisungba ya arishi küm 58 tain Hozheto Yeptho, S/o- Zhukhuvi Yepthomi, Village-Akaba, PS-Aghunato, District- Zunheboto ta jangjaogo aser pa dak teko aser tekong nung zübu liasü.

Asür Hozheto Yeptho ya NST Department nung ISBT Purana Bazar indang chowkidar ka ama inyaka liasü. Police aser Forensic expert temi iba lendong ataloka aliba tesem nung bushisü ngdanga liasü.

Tasü sang kinungsüi police dang ken o ka agütsüba nung, akhi ama la kinungbo ya Brehostibarneap 4:00 ako meta ISBT Complex gate lapoktsü atema ao saka kidangi meyipa meshilang aser pa bushia aoba mapang pa tasü mang ya ozü jalai ISBT building tesülen ngutet, ta shia liasü.

Pa dak zübu kar keta liasü ta lai police dang ashi.

Bushisü ngdanga mapang police temi CCTV footage ka nung Hozheto Yeptho ya August 24 anepdang zü ngia lia ISBT Complex telung nung pa tepseter südi ta temolung melemi aliba nisung ka arishia aoba angu, ta sangdong ajanga ashi.

Lezo Seletsu-i tenu tepsetba aitsür: SAYO

Dimapur, Luroi/August 24 (TYO): Lezo Seletsu-i August 20, 2023 nü Kohima district kübok Pfuchama village nung tenu Rokozeto Seletsu tepsetba khukhua aitsür, ta Southern Angami Youth Organisation (SAYO) sangdong ka ajanga ashi.

Lezo-i pa tenu chichiba dak iba ama mapa tamajung inyakba ya meimchiri kodanga mebilemba ka lir aser asen sobaliba aser loktiliba nungbo mali. Teti ya pa tenu aser adianu asoshi nükrangdong ka amai zü ngshir, ta SAYO sangdong

Temelaba makai iba complex telungi aita aliba apütsü merang dang osset techira kar agi pa tepset südi, ta police temi temolung melemeti lir.

Police temi CCTV aser mapa tamajung inyakba tesem nung kuli akabatem bendena asadanga mapang lir. Post mortem agiba sülen tasü mang ya kinungertem nem amoktsüogo aser iba dak sendakba nung ken o ka benoka bushisü ngdanga mapang lir, ta sangdong ajanga ashi.

Dimapur District Citizens' Forum-i aitsür

ISBT Dimapur nung chowkidar inyaker Hozheto Yeptho taochi mesayui tepsetba khukhua aitsür, shiba August 24, 2023 anepdang 6:00 ako meta tasü mang ngutet, ta Dimapur District Citizens' Forum (DDCF) sangdong ka ajanga ashi.

Dimapur nung iba ama mapa tamajung inyakba ajanga temolung ani mesü ngzükter aser nüburtem takum kodanga lendongbang nung meyutsütsüla aser yimti nung security system repringshia tajungba kumdaktsütsü nungdaker ta bilemer, ta DDCF sangdong ajanga ashi.

Iba ken o tajungtiba aser tekeratiba nung bushisü ngdanga aibelener pua tapet temerenshi agütsütsü ozü ng amshirtem dang ayongzükter, ta DDCF sangdong ajangasa ashi.

ajanga ashi.

Yimjung meimba aser ochi angatetba lokti ka ama, ibai kangasa tia maka, agizüktsü makoker aser tematiba jenjang nung aitsü, aser iba ama tazü mapa inyakba asen loktiliba nung talidak maka. Anungji ozü ng amshirtem dang tekeratiba nung aibelener pua tapet temerenshi agütsütsü akhanger, ta SAYO sangdong ajanga ashi.

Kasa mapang kinunger, tembar aser pa meteta alirtem den asükhu lemsateper, ta sangdong ajanga ashi.

Raj Bhavan nung Dr. Imkongliba Ao Martyrdom Day amung



Raj Bhavan, Kohima nung aliba Dr. Imkongliba Memorial Hall nung August 24, 2023 nü Dr. Imkongliba Ao Martyrdom Day amungdang Nagaland Angh, La Ganesan-i Dr. Imkongliba kerakyanglu nem akhum agütsüba noksa nung angur. (Kohima, Aug. 24, 2023)

Dimapur, Luroi/August 24 (TYO): Dr. Imkongliba Memorial Hall, Raj Bhavan, Kohima nung August 24, 2023 nü Dr. Imkongliba Ao Martyrdom Day nungtem nung sentong ka agia liasü. Iba sentong Nagaland Angh La Ganesan den Dr. Imkongliba'er kinunger, Kohima Aor Telongjem, Aonokpu Village Council aser Raj Bhavan, Kohima officers aser staff tem dena liasü.

Sentong nung o jembiba mapang Angh-i ashiba agi, Dr. Imkongliba Ao ya mezü ngpur ka aser nükla tajung aketba lenir ka liasü, shiba state puti otsü nung tammang tia ka ajangshia aoba mapang teimla akaba lenir ka liasü aser Nagaland ya Indian Union nung state 16 buba akümtsü atema lenmang sapokba nung pai teyari agüja liasü.

Mezü ngpurtemi lenla balala nung teyari agütsüba aser taküm bendanga agütsüba atema Nagaland nung aliba nüburtemi teti bilemteta tenü ng sang agütsütsüla, ta pai ashiba den

nüburtem atema bendanga agüja inyakba nisungtem temolung nung rizü ngia ayutsü aser ibaji ajanga maneni nüburtem ajungmesotsü imlaba lemsatep.

Paisa, state nung yimjung aser terenlok asoshi ajaki aginüba ama tang tejakleni odar, ta ashi. Angh-isa nüburtem dang parnoki bendanga agüja inyakba tanaben jangrushidakja mezü ngpurtem aser state ngutetertem nükjidong ataloktsütsü asoshi inyaktsü ayongzükta liasü.

Sentong nungsa Dr. Imkongliba Ao'er jabaso Tali Longkumer, IAS (Retd.)-i par kinungertem tenü ng nung o jembi aser, tebu, shibai linük longjemdaktsütsü atema pa taküm bendanga agüja liasü, pa bilemteta iba ama tetushi agütsüba atema Angh danga pelaba lemsatepa liasü.

Paisa, Dr. Imkongliba Ao lenisüba nung Naga nung lenirtem Delhi-i ao, kong GOI aser Naga nung lenirtem tsü ngda 16 Point Agreement nangzüktepa liasü, ta ashi.

Maneni iba tenangzüktepa ya mapang talangka süiaka tang tashi tenangzüktepa rongnung tongtipangtiba ka lir, ta pai ashi.

Tali Longkumer-isa tebu bilemteta jembiba mapang, tebu ya mapa agi inyaka sayuba nisung ka, shibai Tsü ngrem kanga akümtsüba aser nüburtem libaliro tajungba ka asoshi yimjung nungdaker ta amanga liasü, ta ashi.

Iba tangatetba dak ajemdaker pai Naga Peoples Convention mezü ngbuba tir asütsü khuret agizükta liasü, ta pai ashi.

Maneni sentong nung Kohima Aor Telongjem tatong tir Moa Jamir aser Aonokpu Village Council Chairman Alemmeren natia o tatsütsü jembia liasü.

ADC to Governor, Watichuchang Jamir, NPS-i sentepa aliba lokti nem Dr Imkongliba Ao taküm indang metetdaktsü. Iba sentong ya Secretary to the Governor, Rajesh Soundararajan lenisüba nung agi aser Dr. Imkongliba Ao nem tetushi agüja narö agütsüba mapang tatsüka agia liasü.

NSCN/GPRN-i Tenimiya Parliamantarian tem den shisa lemsatep

Dimapur, Luroi/August 24 (TYO): Angami, Chakhesang, Rengma aser Pochury Regions tem nungi Parliamantarians den shisadokden senden ka August 23, 2023 nü Hotel Vivor, Kohima nung mena liasü, ta NSCN/GPRN sangdong ka ajanga ashi.

GPRN kübok region ajunga indang Parliamantarians tem Consultative Meeting ayongzüktsü apitetsang Maj (Retd.) Kewe Mero, Hon'ble Kilonser ajanga iba senden ayongzükba nükjidong angatetdakja jembidang, Naga political issue nung rangloker telungjem aser amalitep nung tashi itshitsü aser tajungba nung angatetteptsü nükjidong nung iba shisadokden mensem ya

ayongzük, aser iba ya ajanga nüburtem den tesendaktep tajungba yangertsü, ta ashi.

NSCN/GPRN nung Tatar, Dy. kilonser, kilonser, member of steering committee aser executive member nungi tenzüker 'hierarchical rank structure' nung lir aser nisung ajak jenjang jangja-jangja shia lir, ta pai ashi.

Maj Mero-i Angami aser Chakhesang kin nungi zü ngsemtem dang kin ka ama "Nagaland for Christ" yimym nung shia aliba ama alitsü aser senden balala mena sensaksema telungjem ajanga Naga nung puti otsü lepa repringtsü ayongzük.

Pai ayongzükba ya kanga tongtipang lir, kechiaser Angami

asur Chakhesang nungertem tsü ngta temolung machiba jembitema mapang ka lir.

Iba senden nung shisalen sayurtem rongnung Lt.Gen(Retd.) VS.Atem, VC, Hon'ble Member, Collective Leadership liasü aser pai Laishiba nung shia aliba ama Tsü ngrem bushia alitsü ayongzük.

Pai Naga nung Haipou Jadonang asoshi tejak tenteta jembia liasü, shibai British nung anema ola adoka Naga nung saru magütsütsü aser British sorkar den amalitep makatsü ta jembiba yong pa takum lendong nung ali, ta ashi.

India nung den medemdangra 'political consciousness' nung Naga

nung tepila mali. All India Congress Committee senden ka Mumbai nung amenba sülen Mahatma Gandhi-i August 8, 1924 nü 'Quit India Movement' tenzüker. British nung Naga lima nung 1882 küm mezü ng tetsü ng ajemokdang Naga nungeri memolungi nokdak aser 1929 nung Naga Club tenteta Naga nung kisü ng yutsütsü asoshi Simon Commission nem memorandum ka agütsü, ta pai ashi.

Northeast aser India nung aliba chuba yimli tilatem ama Naga nungeria India den adentsü memolungi meyongnem agüja liasü aser NSCN nem January 23, 1993 nung UNPO zü ngsem agütsü, ta Gen. Atem-i tejen

otsütem ashi.

NNC kübok Naga nungeri 1964 küm ceasefire zülutepa Naga nung yimtenren ken o ya yimjung nung angatetteptsü agizük aser Naga nung masü India nungeri mamshi, ta pai ashi.

1972 tashi Nagaland ya Ministry of External Affairs kübok liasü saka Ministry of Home Affairs küboki aitdaktsü. Mezü ngbuba India ato kilonser Jawaharlal Nehru-i Naga nung anogo ishika nung samatsütsü ta shia liasü. Ajisüka küm 70 dak tema liyonga arudang ochi shidak lir. Tsü ngremji ochi aser Pa Naga nung telemetba ajak nung dena aru, ta pai ashi.

(Maneni tapak 2 nung...)

Impur nung Nurse-tem sentong aka



Impur nung Trained Nurses' Association of India(TNAI) Nagaland State Branch pur 3rd State Level Student's Nurse Association of India Meet 2023 nung adener tem külemi tangokba noksa.

Impur, Luroi / August 24(TYO): Impur nung Trained Nurses' Association of India(TNAI) Nagaland State Branch pur asoshi 3rd State Level Student's Nurse Association of India Meet 2023 August 22 nungi tenzüka 23 nü tashi "Empowering Nursing Students: Prospects and Challenges" omen nung ajemdaker School of Nursing Dr.Imkongliba Memorial District Hospital Mokokchung ajanga ayongzüka kaogo.

August 22 nü iba sentong tenzükdang sentong nung tetushi tejaoker IMDH Mokokchung nung Medical Superintendent Dr.S.Marina Yaden liasü aser la ajanga Naga lima tesem balala nungi arur nurse-tem ajungshia jembia aser ABAM nung

Executive Secretary Rev.Dr.Mar Pongener ajanga iba sentong nung Tsüngrem temoatsü jazüksüba den Nagaland nung aliba nurse-tem ajak asoshi temoatsü meshija sarasadem.

Iba 3rd State Level Student's Nurse Association of India Meet 2023 ayongzüker achayanger tongti Vice Principal & SNA Advisor SON IMDH Wt.Temsusenla Aier-i ashiba agi,tang 3rd State Level Student's Nurse Association of India Meet 2023 ayongzüka akaba ya Naga nunger nurse-tem kati ka den metettepa aser parnok tsüngda angazüktepa shisatsü renlokdahtsüsü asoshi lirta ashi.

Iba sentong nung Nagaland District balala institution 9 nungi

ANM,GNM, aser BSc Nursing pur 320 adenshi aser tetoktepa balala agiogo aser iba tetoktepa nung takok angurtemji National level tetoktepa nung Nagaland state tenung shilem agitsüta laisa metetdahtsüsü.

Iba sentong akaba nüngtem nung School of Nursing Dr.Imkongliba Memorial District Hospital Mokokchung ajanga Running Trophy ka tenzüka liasü. 4 buba State Level Student's Nurse Association of India Meet Dimapur nung 2025 kum akatsü.

Takum 2023 kum 3rd State Level Student's Nurse Association of India Meet 2023 nung tematiba takok angurji College of Nursing CIHSR Dimapur liasü

NSCN/GPRN-i Tenimiya Parliamentarian...

(TAPAK 1 NUNGI...)

Naga nunger aliba tesemtem nung ali rongsen peria aliba nungi ajangzüksü asoshi India-i Constitution tenung amshitsü akok, ta Kilonser Kihoi Swu-ia khuret lemsatempa liasü.

Pai August 3, 2015 nü zülutepba Framework Agreement nunga kongshia jembidang, telok/nisung kar yimtenren tsütsü nükla talang meliaka Framework Agreement ya melentsü kechia maka, ta ashi.

Naga political issue ya alima dang metetdahtsür küm 70 dak tema arur aser aibelen kecha mongutet, ta pai ashi.

Gen. Atemand Brig (Retd.)Akho Naga, President, Tenyemi National Workers Forum ajanga Register of Indigenous Inhabitants of Nagaland (RIIN) indang jembidang, ibai Naga nungeri aginüba ama masü aser mapa kuma meinyakdahtsüsü, ta ashi.

"Nüburtemi yaritsü aser amalitep akatsü asoshi asenoki telungjem, jungshitepa tanüla aser bendanga agütsür inyakba yimyatem sayutsüla," ta Education Kilonser Jongpong-i ashi.

Collective Leadership

Member, Zarsie Nguthe-i Tenimiya national workers tem dang temolung agüja inyaksü ayongzüker, kechiaser sorkari Kewe Mero nem Kilo Kilonser menden aser KK Angami nem Steering Committee Convener menden agüja lir, ta ashi.

Naga lima takok angutsü asoshi Tenimiya workers temi amalitep akatsü maongka tajungtibaji tangya lir aser iba ama tongtipang mapang ka nung jena maotsüla, kechiaser ibai Tsüngrem nungi jena aoba amai asütsü, kechiaser Nagalim aser nisan ya Tsüngrem nungi anguba lir, ta pai ashi.

Kohima nung ARESA Hon Jubilee mungogo



Kohima, Luroi/August 24 (TYO): Assam Rifles Ex-Servicemen Association (ARESA) Kohima Hon Jubilee tanü Kohima Garrison nung mungogo.

Sentong nung o jembiba mapang Maj Gen Vikas Lakhera-i ashiba agi, tanübo Assam Rifles kanga melenshiogo aser taoba mapang dang nungi tang tayongzüka balaka kümogo aser ajak dang tongtibangtiba nükjidongji nüburtem ka kuma longjemdahtsüsü asoshi lir.

State nung aliba nüburtem takok tashi yaritsü atema

Assam Rifles bendanga agütsür lir, ta pai ashi.

Paisa, Assam Rifles nem pei service ajunga bendanga agütsüba atema ARESA züngsemtem nem tenüngsang agütsü aser tintet rongo kaka ama parnok nem tetushi agüja liasü. "Linük asoshi nenoki bendanga agütsüba aser nenok service atema aküm tetushi agütsür," ta pai ashi.

IGAR(N)-isa, parnok ya tanü AR sepaitem den taoba mapang Assam Rifles sendakteptsür kaka lir ta shia parnok ajungshia liasü. Pai, Assam Rifles-i tarutsü nunga

ARESA maneni nongita yaritsü tenangzüka agütsü.

Maneni Maj Gen Lakhera-isa, ARESA indang 50th Golden Jubilee Board sayaja liasü.

Kasa mapang nung ARESA tir Merman Pradhan-i ARESA Kohima indang puti otsü tatsü agi lemsatep aser Ex-Servicemen kinungertemi sentepa aliba lokti ken aser tsüngsang agi peladahtsü aser Yuvraj Thapa, Santoki Pradhan aser Rebecca & Ethel nungeria shilem balala agia liasü. Iba sentong nung gallantry awardees aser veer naris tem nem tetushi agüja liasü.

PM Street Vendors' Atmanirbhar Nidhi (PM SVANIDHI) scheme indang metetdahtsü

Dimapur, Luroi/August 24 (TYO): State Urban Development Agency aser Directorate of Urban Development ajanga Nagaland sorkari Prime Minister Street Vendors' Atmanirbhar Nidhi (PM SVANIDHI) scheme indang metetdahtsü.

Iba Central Sector Scheme ya Ministry of Housing and Urban Affairs-i senotsü teyari agütsüsü aser iba ajanga lendi nung yokyatsüyartem nem Special Micro-Credit facility ka asoshi maongka agütsü, kong 2020 küm June ita nungi tetemlok kanga ajema financial institutions tem ajanga parnoki tozüksüsa loan agüja arudar.

Iba dak sendakba nung Ministry of Housing and Urban Affairs, Government of India-i, state aser urban local body jenjang nung August 1 nungi tenzüka October 31 nü tashi ita asem 'PM SVANIDHI Campaign' ka ayongzüker. Iba campaign ya radio, TV, social media posts, aser on-ground outreach initiatives balala densema Information, Education, aser Communication (IEC) inyakyim balala ajanga scheme ajanga tajangzüker agütsüba indang lendi nung yokyatsüyartem nem tangazükba agütsüsü nükjidong nung ayongzüker. Iba inyakyim ajanga scheme den lendi nung yokyatsüyartem

sendakba nung osang tejangjaba agütsü atema District Headquarters 11 prongla District Urban Development Agency aser Urban Local Bodies 39 prongla nung Administrative Office den tongteprateptetsü mesüra www.pmsvanidhi.mohua.gov.in sendanga osang agitetsü.


timba sendakteptsüsü nükjidong lir.

PM Street Vendors' Atmanirbhar Nidhi (PM SVANIDHI) ya special micro-credit scheme ka lir aser iba ajanga linük nung lendi nung yokyatsüyartem lakh 50 ajangzüksü. Iba scheme ya 2020 küm June ita tenzüker aser iba ajanga COVID-19 wara pokteter linük ajunga mokdanga ayuba sülen lendi nung yokyatsüyartem parnok shishilemba tenzüksüshitsü atema working capital loan agütsür. Scheme nungsa parnoki tozüksüsa loan tem tetemlok ajemer agütsür. Tamshirtemi mela mela amshitsüsa application aser approval atema digital platform ka lapokja lir aser iba ajanga parnok nem teyari agütsüba nung tongtibang shilem agia arudar. PM SVANIDHI yagi lendi nung yokyatsüyartem libaliro nongitba dang masü saka local rongsenketzüng renloka aoba aser yimti aser jila balala renloka aoba nung teyari agütsür.

Iba dak sendakba nung osang tejangjaba agütsü atema District Headquarters 11 prongla District Urban Development Agency aser Urban Local Bodies 39 prongla nung Administrative Office den tongteprateptetsü mesüra www.pmsvanidhi.mohua.gov.in sendanga osang agitetsü.

Iba dak sendakba nung osang tejangjaba agütsü atema District Headquarters 11 prongla District Urban Development Agency aser Urban Local Bodies 39 prongla nung Administrative Office den tongteprateptetsü mesüra www.pmsvanidhi.mohua.gov.in sendanga osang agitetsü.

Imkong Imchen-i Rajeev Chandrasekhar den ajurutep



Dimapur, Luroi/August 24 (TYO): Advisor, Information & Public Relations and Soil & Water Conservation, Imkong L. Imchen-i August 24 nü New Delhi nung Union Minister of State for Electronics & Information Technology and Skill

Development & Entrepreneurship den ajurutepa liasü. Imkong Advisor den külemi Director IPR, Dzuvinuo Theunuo; Additional Director, Kevizayieno aser tanga state ketdangsurtemi Union Minister den ajurutepa liasü.

Kohima district atema Polling Stations indang draft list renemogo

Dimapur, Luroi/August 24 (TYO): Kohima district kübok Polling Stations tem tali tejangjaba metettsü mechi Annexure 3 nung aliba Draft List of Polling Stations bendena lir aser reprangshimtsü asoshi Notice Board nung yuja lir, ta Deputy Commissioner & District Election Officer, Kohima, Shanavas C IAS ajanga

sangdong ka nung metetdahtsü. Iba list ya Office of the Deputy Commissioner & District Election Officer, Kohima nung aliba Election Branch nunga reprangtsü akok. List nung tai aputsü kar lira, tezüluba nung August 29, 2023 tashinung Kohima DC Office tongtsütsüla, ta sangdong ajanga ashi.

BRICS senden nung PM Modi aser China Tir Xi na ajurua jembii



August 24, 2023 nü Johannesburg nung BRICS senden nung Ato kilonser Narendra Modi-i Bangladesh Ato kilonser, Sheikh Hasina (abelen tsütsü temaba noksa) den linük balala nungi lenirtem ajurudang tangokba noksa nung angur.

New Delhi, August 24 (Agencies): Brihostibarnü Johannesburg nung BRICS senden aliba mapang nung Ato kilonser Narendra Modi aser China Tir, Xi Jinping na mapang tatsüka ajurua jembii, ajsüaka iba mapang nungi tenati kechisa jembiar memetet.

BRICS linüktemi ano züngsem tali züngoktsü atema telemtetba agi aser linük trok dang iba telok nung züngsem akümsü akok ta metetdaksü.

Anogo asemnü BRICS senden nung ano züngsem tali züngoktsü atema China leniba nung o lemtepa aruba sülen tesüsa BRICS linüktemi Argentina, Egypt, Ethiopia, Iran, Saudi Arabia aser United Arab Emirates linüktem iba telok nung züngoktsü lemet.

South Africa ketdangsertemi, BRICS nung adentsü atema linük 40 dak temai melunga lir, aser item

linükji teimbaka 'Global South' nungi lir, ta metetdaksa liasü.

Iba senden nung Ato kilonser Narendra Modi-ia, BRICS telok nung züngsem tasen anioxtsü atema melunga lir, ta metetdaksa liasü.

BRICS züngsem linüktemji Brazil, Russia, India, China aser South Africa lir.

Ato kilonser Modi aser China Tir Xi Jinping na jurila senden amentsüa akok, ta imlaa liasü saka tena khen ajurutepa jembiba dak alaka sendenbo mamen.

Galwan Valley nung India aser China sepaitem tsüngda raraba sülen nungi tenzüka küm pezü jungnüa Modi aser Xi na senden khen danga mamen.

BRICS senden tatembangbuba anogo nung Modi-i Iran, Ethiopia aser Mozambique nungi tongti lenirtem ajurua jurila senden menogo.

Tang tesüsa India aser China tsüngda Corps Commander level senden amenba mapang nunga anüdoklen Ladakh nung mangatettep ken otem mebeneteti liasü.

Hokolbarnü Ato kilonser Modi Johannesburg nungi Athens, Greece-i aotsü aser pai Greece Ato kilonser Kyriakos Mitsotakis ajurutsü.

"Tang mezüng ni akhi lima ya semdangtsü. Küm 40 sülen tang mezüng Greece semdangba India Ato kilonserji ni asütsü; iba ya ni asoshi akhümket," ta Modi-i metetdaksü.

15buba BRICS senden nungsa India nungi business team kata South Africa-i oa Business Tracks senden nung adenba den külemi BRICS Business Council, BRICS Women Business Alliance aser BRICS Business Forum nunga denogo.

Linük nung shisaliok aser medical facilities tajung nungdak: Atishi

New Delhi, August 24 (Agencies): Tesüiba küm 76 tsüngda India kanga renlokogo, ajsüaka ano lenla aika nung inyaksü nungdak; talisa shisaliok aser medical facilities tajung agütsütsü atema inyaksü nungdak, ta Brihostibarnü Delhi Education Minister, Atishi-i metetdaksü.

State tesem ajaklen school competition 'India of my Dream in 2047' nung takok angurtem nem AAP lenir,

Atishi-i tenüsang agütsüba sülen lai, "Kaketshirtem den shisa lemsatepba mapang nung parnoki linük nung shisaliok tajung aser medical facilities tajung nungdaker ta shiogo. Ano kaketshir katibo nübur tsüngda tebandang kecha malitsüla ta shiogo. Hindu nung sükaka Muslim sükaka Sikh sükaka Khristan sükaka ajak kasa züngshitsüla," ta ashi.

Delhi education minister-isa, tang tashi linük tesem aika

nung nüburtemi shisaliok tajung, medical facilities aser mapa maangka mangur, ta ashi.

"Mapa mangurtem aika lir aser tetsürtemi pei kidang nungi ayazüka aotsü tsübuba tesem aika lir," ta Atishi-i ashi.

"Delhi nung sorkar school tem nungi kaketshirtem aser tanurtemi linük tajungba kümdaktsütsü nükjidong yura, atangji parnoki yamaji inyaktetsü," ta laisa shisem.



Patna, August 24, 2023: ISRO indang Chandrayaan-3 ita nung takok ngua anentetba atema Brihostibarnü Patna nung aliba Patna Women's College nung azüngertem benjungtepdang tangokba noksa nung angur.

GOVERNMENT OF NAGALAND
DIRECTORATE OF YOUTH RESOURCES AND SPORTS
 NAGALAND: KOHIMA
 NO.DYRS/SPORTS-Cash Award/9/2016
 Dated, Kohima the _ August 2023.

PRESS RELEASE

In commemoration of the National Sports Day 2023 to be observed on 29th August 2023, the Cash Award Programme to Meritorious Sports persons for the year 2020-2021, 2021-2022 & 2022-2023 will be held on 29th August 2023 at IGS Kohima at 11.00 am. The award will be given to those who won medals in recognized disciplines/tournaments affiliated to NOA in the International, National & North-East levels. The concerned medal winners who have submitted their certificates are asked to collect the award personally.

Sd/-
KETHOSITUO SEKHOSE, NCS
 DIRECTOR

Karnataka sorkari ISRO nem tetushi agütsütsü

Bengaluru, August 24 (Agencies): Chandrayaan-3 takok ngua ita nung anentetba ya putiotsü takok ka lir, ta shia Brihostibarnü Karnataka Chief Minister, Siddaramaiah-i, state sorkari sentong ka ayongzüka ISRO team nem tetushi agütsütsü, ta metetdaksü.

Chief minister-i Bengaluru nung aliba Indian Space Research Organisation (ISRO) Telemetry, Tracking and Command Network (ISTRAC) nung Missions Operations Complex semdanga ISRO chairman, S Somanath aser pai aniba team nem tenüsang agütsü.

Paisa ISRO scientist tem aser ketdangsertem den sensaksema liasü.

Siddaramaiah-i, "Sorkari Banquet hall, Vidhana Soudha nung sentong ka ayongzüka parnok nem tetushi agütsütsü. Iba maparen nung Karnataka nungi scientist 500 shii shilem agiogo. ISRO Chairman (S) Somanath aser par team nem tetushi agütsütsü," ta metetdaksü.

Bengaluru nung

osangbenertem den jembidang pai, ISRO mapatong balala nung sorkari amaliteptsü aser nungita yaritsü; ISRO space agency ya linük atema akhümket, ta ashi.

"Iba maparen takok angutsüsa scientist temi ama-sangwa methitemi inyakogo. Linük nung scientist 1,000-i iba project nung shilem agi aser Bengaluru kija nungia parnok 500 shi liasü," ta Chief Minister-isa metetdaksü.

ISRO team nem tetushi agütsütsü anogoji September 2 sülen ang lemtetsü, ta pai ashi.

Bodhbar nikongdang 6:00 ako tera süir ISRO indang Chandrayaan-3 Lander Module (LM) ita nung takok ngua anenzüka liasü.

Tang tashi nung India densema linük pezüü dang iba alizüng tongteta lir aser ita south pole nung anenzükba satellite bo Chandrayaan ya dang lir.

Lander Module nungji lander (Vikram) aser rover (Pragyan) lir.

Brihostibarnep ISRO-i, lander nungi rover ji aluogo aser "India-i ita nung jajaogo," ta sangdonga liasü.

Tamil Nadu sorkari Himachal Pradesh nem sen crore 10 teyari agütsü

Chennai, Luroi/August 24 (Agencies): Himachal Pradesh nung zünglu maneni aruba ajanga anentsüh aser zümetsüng lendong ajanga nisung aika asüba den kiojen aika raksaogo, anungji takoksa angurtem nem teyari agütsütsü atema Tamil Nadu sorkari Himachal Pradesh disaster relief fund atema sen crore 10 tenla agütsüogo, ta Brihostibarnü Tamil Nadu sorkari sangdong ka ajanga metetdaksü.

Tamil Nadu chief minister, MK Stalin dang pelaba lemsatepa Himachal Chief Minister, Sukhvinder Singh Sukhu-i, tang ama lendong mapang nung item ama tenla ajanga nungdakbapurtem aika nem teyari agütsütsü, ta metetdaksü.

Paisa nüburtem dang disaster relief fund atema tenla agüjang, kechiyong ibaji ajanga dang takoksa angur kibong aika yaritetsü, ta mepishia metetdaksü.

Tamalen Karnataka, Rajasthan aser Chhattisgarh state sorkartemia Himachal Pradesh nem sen crore 41 teyari agüja liasü.

Bodhbarnüa zünglu maneni aruba ajanga Himachal Pradesh kübok tesem aika nung lendong balala nung nisung tenet asü aser gari lenmang 400 shi mokdangogo.

State nung ano maneni zünglu arutsü, talisa Kangra, Kullu, Mandi aser Shimla nung zünglu sashia arutsü, ta IMD-i tekümdangtsü metetdaksüogo.

Bodhbarnü Shimla nung nisung ana asü aser Mandi nung nisung pongu asü.

Tan ita kija nunga state nung zünglu dak sendakba lendong balala nung nisung 80 dak tema süogo. Taküm June 24 nungi tenzüka tang tashi nung Himachal Pradesh nung anentsüh aser zümetsüng lendong densema lendong balala nung nisung 238 süogo aser nisung 40 bo samar mangur, ta ketdangsertemi metetdaksü.



TIR YIMYIM YIMOBILEM (EDITORIAL)

DIMAPUR ROGONÜ, LUROI (AUGUST) 25, 2023

India-i ita tongogo

Alima tsüngdang India asoshi nümadangtsü kaji, Indian Space Research Organisation (ISRO) nung inyaker Scientist-temi yakanü itai atuba tayimtsü Chandrayaan-3 alima nungi kakheta yoker anogo 41 buba nung ita nung tuagi jungjunga anentetba takok mapaji asütsü. Chandrayaan-3 itai yoktsü asoshi renemba mapa ya sen crore 615 endoka inyakba mapa ka lir. Aji oda, sen endokbaji masü saka iba mapa nung inyaker scientist-tem shi azü aser tokolok belemba aser shisabolubaji kecha jenjang dena medemdangtsü makok. Yakanüa Chandrayaan-3 ji ita nung manen tashibo parnok mulung nung tongtonglatsü atua shisaboluseta atatepa liasü. Iba tayimtsü ya alima nungi July 14 nü kakheta yokba anogo nungi anüngdak nung kilometer lakh 3.84 shi jajar külen yakanü August 23 nikongdang ita nung tanemi anentetba takok jagi India alima kintem rongnung temaba jenjang kati tuogo. Tang tashi nung ita nung tua tayimtsü anenteter alima kintemji USA, China aser akhidang longjema aliba lima USSR dang liasü, anungji parnok rongnung India-a züngsemer. Iba jagi ita tongtetter alima kintem rongnung India pezübuba kümogo. Atangji, Chandrayaan-3 yabo America nungertemi yokba Apollo Mission amato masü, nisung maden ser tayimtsü yokba dang lir, anungji tang tashi nung ita nung tetsüng ajemokdang nungtemjibo America nungertem dang lir. Joko, India asoshia itai nisung yoktsüba mapaji anendaka lir. Atangji, alima nung alir temeteter kintem asoshi ita atongbaji tatembang masü saka ano ita ajanger alima mesükba petinu aika lir aser item rongnungji taküm alitsü akokba petinu kaji Mars ya asütsü südi ta scientist-temi bilemer. Ibaji dang masü saka Mars ama petinu lima kar nungbo nisung ama taküm karbo alitsü amai scientetist-temi bilemer. Itemji tang US aser China ama limatemi tebushidak lir aser ISRO sentong nunga ita atongba sülenbo Mars atongtsüba mapaji lir. ISRO ya America nunger ita nung tetsüng ajemokba küm, 1969 küm tenzük aser iba anogo nungi tenzük yakanü Chandrayaan-3 ita nung anendaksütetba mapa tashi India nung yimten yimsüsür aser scientist aikati kanga meranga inyakogo. Atangji, alima nung mapa ajak yimten kübok yimten yimsüsürtemi telemtetba agiba nung aoer asünungji, shir mapang ali nung süli, anüng nung süli tashitemeteter aser inyakerteri takok ngudir, par tenüng agir, aji alima yimya. Ajisüaka, yakanü ama ita nung tashi tua tayimtsü anendaksüba mapa nung scientist-tem nem tenüngsang agütsütsü melen yimten yimsüsürtem rongnungang BJP-i inyaker mesüra Congress-i inyaker ta nüngsang raktepra, iba jagi ita nungi Mars atongtsü melen ita nung tua alibaji dena alii atsüzüktsü merangba mapa ka asütsü. Ita petinui tayimtsü yokbaji tenüng agitsü atema yoker masü saka yangji aliba rongsen, shisatsü aser kechisarina indang bushitsü asoshi alima nung alir tashitemeteterteri inyakba sentong ka lir. Joko, ita nung alima kin pezüibo pei kin wako songogo. Ajisüaka, iba jagi ita nung ali mekar masü saka ita atongba tamaitü sayurba lir. Ajisüaka, kodang ita petinu nung alima nung alirtem nungdakba rongsen nguteta alimai bener alu tenzükdir, idangjibo ita aser petinu nungjia tua alima kintem ali raktep tenzüktsü. Aji oda, tangbo alima nung ali aser tzu raktepa rarar saka küm ishika sülenbo, ashiko, alima kintem tsüngda ita petinu nung raratsü. Aji oda, kar mangbo ita nungjiang aremtsüa akok. Tanü putu nung alir taintemi dena iba putuji angutsü aser ajangshitsü. Joko, Naga nunger rongnungia dena itai tayimtsü yoker ISRO nung Scientist-tem rongnung dena lir. Ibaji asenok ajak asoshi tepelatsü aser tayongzükba tuluka asütsü. Ibai alima nung ali tilaka asoshi tangar den tsükchitepa aliba mapang masü mesüra ita sen tilaka chia tebok mesütsü atema backdoor nungi mapa bushiba putua masü mesüra ochimashiba rongsen agi takar akümtsü bilemba putua masü mesüra yi jema aser mozü mora chia aliba putua masü, saka ibai ita nungi petinui aotsü bilemba putu aser ita petinu nungi rongsen bener alua nübortem nungdak peridaktsütsü bilema amuia moi shisadanga inyakba putu lir. Iba putu nung alir ta asenokia rajemtetra, asenokia ita petinuiji tongtettsü.

OLEMSABANG

AOR KHRISTANTEM APUSUANG

- M.Meren, Ex.Pastor Ungma

Aortem 1872 mapang tashi nungbo ano yim o yim na aser nisung ka o ka na tsüngta lepteptsüngtep teyalong liasu, anungji kishikinar o kishikinar na tsungta shishilemba mesütet, pei yimtsüng nung pei lushi nung aki-alu meyimtet kati ka tsübuba agi alu meyimtet ser ayawara tulu liasü, saka iba mapang nungji Dr E.W. Clark Sibsagar nungi aposua atua tenemlenji pa kolak mengazüka lua tekongneta repranger Molung tenem jagi aposu aser lenmang nung ali tesa nung konung yipzükter tananu Molungji pungtet, yamaji pa Naga tenem jagi atuba ajanga kishikinar tsungta yimjung lapok, aser nisung tsüngta nung yimjung adok aser yim ka o ka na tsüngta shishilemba süteta tebok sünga aliba ajanga kika süchir jenti atoka takar aika aküm aser ayawara anena aküm, aser tongtibangsa Aolima nung tashir jenti adoka Naga lima nung Aor shisanga aküm nung Aori anir Molungyimsen nung mezungbuba Ao Mungdang tulu sentep aser kishikinartema aika arua aten aser ajaklen yimjung lapoka ao.

Aji oda America lima nungi pei kolak lepzüka bener aotsü metsübui asen Naga tenem limai Clark atuba ajanga tanü asenok kechi tia nung lir aji lir. Clark Naga tenem lima nungi maludang Sibsagar nung aliba British nunger tulurtemi Mrs.Mary Clark dang naia nü kinungbo pa temang nung tekolak keter Naga tenem nungi arutsü ta amanger no? ta ashiba angur. Tanü asen tia den par mapangji temetemdangma kechiaser iba mapangji asadangtsü makokba putu ka liasü. Clark asen Naga tenemi matu asübo tanü asen kechi tia nung lila?

Iba sülenji joko asen Aortemi Missionarytemi nungloktsüba ama lepteptsüngtep lima koba tang asenoki Mere-Sangtem ta ajar par limai yim o yim na tsüngta yimjung mali tetsübu agi sünger aliba tsüngta nungji yimjung adokdakja Osangtajung sangdong, tanü par lima koba tashi tenük lapoker lir aji asen Aor metsü, parnoki hau sang nunga ta sang saka aji asen tsüraburi nok-nü metsübu oda Dr. Clark nungi angazüka tamang tasü-tait agi nok-nü tsüngta asen Aortemi nungpoka aiba ajanga tanu par tia asen dang nungi tajungba kuma odagi. Saka British Sorkaribo tzu atena Osangtajung bener maotsü ozüng tesashi agütsü saka British ozüng metsübui Osangtajungji bener ojen ao nung Missionary Rev.Kijung dangbo Mokokchung SDO-i jaketa meren aser sen jenti senchi (fine) achi, iba senji Longkhum nunger obala Nokchirabai küpdangtsu aji asoshi Tsüngremi par kibung koda moatsuogo. Tanü asen jakdang aliba obala nungeribo yamaji tasümaken yimjung mapa inyakba angur.

Saka tongtibangsa ano 1954 meta nungi Naga nunger o India nunger na tsüngta Naga nuchiso atema tesüngmangtsü rara tulu adok, idangji India Armytemi Naga nunger kecha maka oda nok-nü dak alaka hatir kecha maka teka tesa alibapurtem den hatir tulu bener tashi ajak agi parnoki rara, Naga nunger ki ajak anaben asemben rongdoktsü, alu mena akaba ajak mi sena rongdoktsü, aser tsükma süng agi züka ao aser yimtsüng nung tebur-tetsür ajak atsüzüka züka züka aika sädaktsü, tanü Kuki nunger rishikangshiba tang taoba benshi, yimtaklir mezüngdangtet Jorhat jail nung, Dibrugar jail nung, Kohima jail nung, Mokokchung jail nung Tuensang jail nung Mon jail nung kum jenti shibanga ayu, aika jail nung asü. Yim pungu-terok yim ka nung atsu tapu asem agi atsubanger küm ka piyong shibanger ayu, aya agi aika asü. Iba timtim marem nung public aika arem nung alitsü kibung ajunga jena oa arem aser alu nung jenoka ali. Yamaji rishikangshi tulu den tasüba jenti ajuruaka asen Naga nungeri pei nüchiso mapa metoktsü aser tasü itta nokdak aser tasü arem.

Iba tensa mapang nungji ABAM lenirtemi anir Arogo nung pastortem ishika shimteter Naga lima yamai tajem tia nung shibanger malitsü saka Yisu dang tamang agi ayimtentü aser " Nagalima Khrista asoshi" (Nagaland for Christ), ta kangki nisan tulu yanglua aji apur Nagalima ajak leni nübu lemsar Naga lima ajakleni Tsüngrem dang tashi tulu meshir lentong tulu mapang nung tasutsü metsübui nuburtem tetsübu tatenten teyalong nung alidang yamaji yimjung asoshi aposu, amang nung tanur tajem tia nung alidang tebu aser tetsü nunger aru ama iba jagi Naga nungertem taten tetsübu anen.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Uganda nung sayutsünger ka densema Khristantem dak azük

Nairobi (Kenya), August 23 (Agencies): August 11, 2023 nü Uganda linük nung moapu ka nung Khristantem sentong agiba mapang yimsü alia amanger Muslim nungertemi sayutsünger den Khristan 20 shi dak azük, ta osang ka ajanga metetdaksü.

Kampala nungi kilometer 236 shi pilar aliba Busolwe nung ayongzükba sentong nungji arrshi küm 34 sayutsünger, Robert Faisali Miya dak azük.

Tanga jila ka nung aliba Arogoi Busolwe nung anogo pongunü evangelistic sentong ayongzükba liasü aser tasemnübuba sentong nungji sayutsünger, Miya-i tatishitsü atema Koran (Muslim nungertemeshi kaket) nungia Lai tekong kar tetshia jemi.

Miya-i, Yisu Khristaji khenyongi balaka aser Laishiba ajanga Khrista ya Tsüngrem Chir ta sayur; Pa asü aser tasü nungi shia aru, ta ashi.

Iba sentong nungji Muslim nungertemi jihadist yimyim

"Allah Akbar [Tsüngrem Tuluba]" ta ayimdena liasü. Iba sülen Muslim nungertemi, Hiisa Mubarak-i sabangi atuba sülen sayutsüngerji atsüzük, ta tenük kuli alirtemi metetdaksü.

"Muslim nungertemi jagi, mamangertem tepsetsü atema Allah-i parnok nem tashi agütsüogo ta ashi. Ano karibo acid amshiba mapang nung nisung kati hadir ka amshia sayutsünger dak azük," ta tenük kuli alirtemisa metetdaksü.

Muslim nungertemi jagi, iba area nung mamangertem nem Muslim nungertemi memesüzükdaksütsü, ta metetdaksü.

Hiisa-i, "Iba jila nung sayutsüngerji mesüra jilai arua ozü nüburttem mesüzüksü atema onoki memelatsü. Allah atema onoki raratsü aser nenok ajak tepsetsü," ta metetdaksü.

Paisa Muslim nungertemi 20 shi dang Arogo kiojen raksajang, ta tuyua liasü.

Sayutsünger kümzüksü meranger Khristantema aika

yiru, kechiyong Muslim nungertemi jagi parnok dak-a azük. Kasa mapang nungjisa Muslim nungertemi sabang, loudspeakers, microphones aser keyboard raksatsü.

Tatemsabo Khristantem jagi Muslim nungertemi nokdangtet aser Muslim nungertemi anasa aliba mosque kati oa jenok.

Sentong ayongzükertemi sayutsüngerji anasa aliba clinic kati anir ao. Tangbo pa kidang mongdar aser tajungba kümдар.

Miya-i, "Khristan 20 dak tema yiruogo; kar tekolak yiru aser kar teka yiruogo. Onoki Muslim nungertemi ajurua sentong agiba tamakok nguogo saka Muslim nungertemi asen Kibuba aser Kümtetdakba Yisu Khrista osangtajung angashiogo," ta ashi.

2010 küm February ita nung Miya-i Islam yimsü toktsür Khrista agizüka liasü. Pa kinüngtsü tena tanur pezü sosema lir aser tanurtemji arrshi küm 3 nungi 13 tsüngdapurtem lir.

Delhi nung Khristantem amakba ken o nung nisung ana puogo

August 23, 2023: August 20, 2023 nü New Delhi nung Khristantem tekülem sentong tagidak mapang amakba ken o dak sendakba nung police-i nisung ana puogo.

August 23, 2023 nü osangbener den jembidang East Delhi nung aliba Arogo nung pastor, Satpal Bhati-i, "Ozü Arogo amakba tatalokba dak sendakba nung nisung ana puogo, ta police-i kü nem metetdaksüogo," ta ashi.

Delhi kübok Tahirpur area nung aliba Protestant Arogo- Siyyon Prathna Bhawan nung pastor, Bhati-i August 22 nü police station-i oa

iba tatalokba Bansal-ibo sangdong ka ajanga, "Ibaji Tenla ki masü saka ki ka dang lir," ta ashi.

Paisa, "Kiyong nung Bajrang Dal züngsemtemi raksha sutras (temeshi lisü) lema senzüba mapang nung parnoki sarasadem sentong agirtemji ajuru," ta metetdaksü.

Vinod Bansal-i, linük tesem balala nung atalokba ama Delhi nunga yimsü meyipdaksüba tatalokba aika lir; itemji nokdangtsü atema ozüng junga maliba ajanga yimsü meyipdaksüba kanga bulua akümer, ta metetdaksü.

Parnokisa Tenla kidang osettsüset balala raksaja liasü.

Ajisüaka August 22 nü Vishwa Hindu Parishad (World Hindu Council) otongdar, Vinod

ANO GO ABEN TSÜNGREM DEN

Asen Yarir Aser Tanüker

T. Ken 121: 1- 8

Iba ken kibong asoshi tongtipang ka lir. Kibong nung Tsüngrem O azüngba aser bushiba yimya süpadaksütsüla." Ni kü nük tenem leni rangketa yoktsü: kolen nungi kü teyari arutsü. Kü teyari Kibuba nungi arur, shibai anüng aser alima yanglu" (t. 1,2). Tsüngrem asenok teyarir lir. Ibaji metettsü asoshi lenti lemangi aotsü menüngdak.

Ne teyari kong nungi arur? Ken züluri pa teyari angutsü asoshi pa tenük tenem leni rangketa yok. Yihuda nungeri jenokdak tajungtiba aser takangji Yirusalem meketa aliba tenemtemji lir ta amang. Idangji ken züluri ashi, "Masü, ni kü teyari tenemtem nungi mangur. Ni kü teyari kotak nungi angur. Tsüngrem kü teyarir lir." Tanü ne nüngdak aser mapa nung teyari Kibuba nungi arutsü, Pa anüngtem aser alima Yanglusang lir. Pai iba lima timi lidaksür. Pa kanga tulu lir. Pai tanü ne tebilemetsü ajak nung yaritsü.

Ano Tsüngrem asenok tanüker lir. "Pai ne tsüng marakzüdaksütsü: shibai na anüker pa amua maotsü. Ajiang, shibai Israel anüker, amua maotsü mesüra memejangtsü" (t. 3,4). Asenok aliba limaji lendong agi sünga aliba lima ka lir. Tsükchirtem asenok anema arur aser raksatsütsü meranger. Saka asenoki Tsüngremi mulungba nung jajara aser Pa dak metaloker lira, Pa asen Tanüker aser Tekümzüker lir." Kibubai na tamajung ajak nungi kümzüksü" (t. 7). Iba tekong yagi asenok shia-shiko kecha malitsü ta mashir. Asenok kodanga timmatemtsü mesüra tejashi malitsü taaka mashir. Asenok yiruaka lendongi malitsü ta iba tekong yagi ashir." Kibubai tamajung ajak nungi kümzüksü, Pai ne taküm nüka alitsü. Tang iba mapang nungi aser teti asoshi, Kibubai na taru tao nug nüka alitsü" (t. 7,8).

Tsüngrem ne Teyarir aser Tanüker lir. Na kongisa odir Pai na yaritsü aser kümzüksü.

Kenya nung kiralongrartemi Tenla ki ka rongdoktsü aser Khristan 2 kaset

August 24, 2023: sülen kiralongrartemi Boni Mongolbarnü (August 22) arem nung jenokogo, ta Kenya linük nung al-Shabaab metetdaksü. Ano tanga tatalokba ka nung al-Shabaab teloki Lamu Garsen lenmang mokdang amakdang Khristan ana tepsetogo.

Anepdang 2:00 ako meta ICC den jembidang police officer kati, "Prangpong amer Redeemed Gospel Arogo nung pastor-i phone ajanga International Christian Concern (ICC) staff ka dang, "Kiralongrartemi onok maakdar. Parnoki ozü Arogo aser tanga kitem nunga mi senoktsüdar," ta metetdaksü liasü.

Somali nung amenoka aliba al-Shabaab kiralongrar teloki al-Shabaab taküm June 25 aser July 12 kiralongrartemi tesüiba ita asem tashi Lamu nung Khristantem amakba kanga bulua kümogo aser ibaji ajanga Khristan school ka nung jenoka lir.

Security officer kati, parnoki kibong 300 dak tema jenshiogo, kiralongrartemi arishia aoba ta ICC-isa metetdaksü.



August 24, 2023 nü Uttar Pradesh kübok Prayagraj nung Rev. Louis Mascarenhas (tiyong) Catholic Church of Allahabad Diocese nung tongti putir inyaksü meshitetba mapang tangokba noksa nung angur.

AO OSHI ANGAZÜKDAK:
TANÜ ANGAZÜKTSÜBA OJANG



Rülok

(v) metenloka yangluba (added for extension)

* Mosem nung tsük masemba agi pakti rülok.

Rülok

(v) reprang (look)

* Nisung ajaki tetsürula dak rülok.

OLONG PAITEP # 6616

1		2		3		4		5
			6		7			
8								
					9			
		10						
11								12
				13		14		
15								
16						17		

TIPIEN

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

LANGTSÜNGLEN

- 1. Jila tulu - (5)
- 2. Sarasademdang tembang - (4)
- 4. Tarutsü indang ashitem - (6)
- 5. Alia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)


OLONG PAITEP # 6615 TELANGZÜBA

TIPIEN :

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

LANGTSÜNGLEN :

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.



POLICE ASER DRIVER :

Police kati gari ka kanga speed nung oya ngur arishimeso, km pungu or menepa anendaktsü.

Police :Na kechiba yamai gari karaa anir, yi jemer senzürba südi tanüa?

Driver :Massüakko saheb.

Police :Sürapangla "M" alphabet amshia ojang ka shiangjong.

Driver :MALPHABET, ok?

Police :Thanai jong.

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Dhemaji nung bomb pokdaksüba nung aija alir ajak nem taitok agütsüogo

Guwahati, Luroi/August 24 (Agencies): 2004 küm Assam kübok Dhemaji nung bomb pokdaksüba ken o nung aija alir ajak nem Gauhati high court-i taitok agütsüogo.

2004 küm Dhemaji nung bomb pokdaksüba ken o nung aija alirtemi taoba mapang lower court kati obendang agütsür aliba Gauhati high court nung tanaben benoka liasü.

Assam nung lower court kati taoba mapang iba ken o nung, Dipanjali Burhagohain, Muhi Handique, Jatin Dubori, Leela Gogoi, Prashanta Bhuyan aser Hemen Gogoi nungeri aibelena

aliba nguteta liasü. Iba dak sendakba nung Dipanjali Burhagohain, Muhi Handique, Jatin Dubori aser Leela Gogoi nunger taküm tepeyong tepuokdak ayutsü atema obendang agütsü aser Prashanta Bhuyan o Hemen Gogoi na küm pezü tepuokdak ayutsü obendang agütsü liasü.

Iba ken o nung aija alirtem nem taitok agütsüba ya Gauhati high court-i Brehostibarnü sangdonga liasü.

Iba ken o ya tatemsa July 24 nü angadanga liasü.

2004 küm August 15 nü Independence Day amungba

mapang ULFA puri Assam kübok Dhemaji college playground nung bomb ka pokdakja nisung 18 tashi tepseta liasü.

Bomb apokba lendong nung asürtem ya timba tanur arishi küm 12 aser 14 tsüingda alirtem aser tetsütem liasü.

Assam police-i ashiba agi, bomb ya college kikümtong anasa rema toktsü aser remote-controlled device ka amshia pokdakja liasü.

School balala nungi kaketshirtem aser tesayurtem kikümtong adena aiba mapang iba bomb ya pokdakja liasü.

Central YMA-i apu chirepba ken o bushisüngdangtsü akhang

Aizawl, Luroi/August 24 (Agencies): Young Mizo Association mesüra Central YMA-i, Mizoram nung Aizawl anasa Sairang nung tang yanglua aliba railway apu chirepba bushisüngdangtsü khangogo.

Bodhbarnü (August 23) Mizoram nung apu chirepba lendong nung nisung 23 tashi taküm samaogo.

Central YMA-isa, ABCI aser Silchar nung amendaker aliba BBJ companies, shirnoki apu yanglur parnok dang iba

lendon nung akoksar alirtem nem temenok agütsütsü khangogo.

Railways-i ashiba agi, gantry ka chirepba ajanga iba lendong ataloka liasü, koba Kurung ayong temdanga yanglua aliba apu dak lunch süa liasü.

Mizoram yimtiba Aizawl nungi km 12 shi pilar Sairang nung tang teyangludak aliba apu ya Bodhbar anepdang 10 ako shi nung chirepa liasü.

Mizoram IGP (Law and Order) Lalbiakthanga

Khangte-i ashiba agi, iba apur chirepba lendong nung nisung 23 süogo.

Asürtem rongnung tasü mang 12 bo jangjaogo aser parnok ajak ya West Bengal nungi liasü, ta pai ashi.

Lendon nung asür tangartem ya-a West Bengal nungi asütsü ta amanger, ta paisa shisem.

Pai ashiba agi, Kurung ayong temdanga yangluba apu chirepba mapang mapa inyaker 26 iba tesem nung liasü.

Mizoram-i Assam den arrtsü nung parnok litsü metetdaksü



Aizawl, Luroi/August 24 (Agencies): Mizoram sorkari Assam den arrtsü nung parnok akhangba litsü indang osang February ita metetdaksüogo.

Mizoram sorkari Assam sorkar nem agütsüba osang, kong tesem kar parnok meyong ta metetdaksüogo, item litsütem kübok artsü nung aliba

yimtsüng kar densema lir.

Iba osang ya Mizoram home minister Lalchamliaiana-i Bodhbarnü metetdakja liasü.

Temetetsü kaji Mizoram kübok Aizawl, Kolasib aser Mamit district tem ya Assam den arrtsü nung lir. Arrtsü ya km 164.6 talang lir.

2021 küm July ita arrtsü dak

sendakba nung state ana tsüingda mangatetep adokba sülen ken o bentettsü atema state ana tsüingda sensaksema arudar.

2022 küm November ita tatemsa Guwahati nung senden amenba mapang state ana yagi, Mizoram-i ita asem tsüingda arrtsü nung parnok indang yimtsüngtem, ali tasazük, geo-spatial extent, item yimtsüngtem nung kechi kin alir aser iba dak sendakba tanga osang tejangja agütsütsü telemtetba agia liasü.

Mizoram-isa, Assam sorkar dang iba dak sendakba nung ken o jangjatsütsü mepenshia shiti ka zülüogo aser telangzüba atadar, ta minister yagi ashi.

GOVERNMENT OF NAGALAND
DIRECTORATE OF SCHOOL EDUCATION
NAGALAND :: KOHIMA

NO.ED/SCH/RIMC/EE/2017-18

Dated 23rd Aug 2023.

ADVERTISEMENT

Advertisement for admission of boys and girls to Class VIII in Rashtriya Indian Military College (RIMC), Dehradun, for July 2024 term to be conducted on 02nd December 2023 (Saturday).

- 1. Both boys and girls are eligible to apply for admission to the RIMC, Dehradun. The candidates should be in the age bracket of 11½ to 13 years as on 01 July 2024, i.e., they should not be born earlier than 02 July 2011 and not later than 01 Jan 2013.
- 2. Candidates should either be studying in Class VII or should have passed Class VII from any recognised school at the time of admission to the RIMC i.e. 1st July 2024.
- 3. The written part of the examination will consist of three papers namely Mathematics, General Knowledge and English. The Mathematics, General Knowledge and English papers will be conducted between 0930-1100hrs, 1200-1300hrs and 1430-1630hrs respectively on 2nd December 2023(Saturday). The date for the interview will be intimated at a later date only for those candidates who secure 50% marks in all the papers in the written exam.
- 4. Application form cum Prospectus and booklet of old question papers can be obtained by making online payment on RIMC website www.rimc.gov.in or speed post by forwarding self addressed slip and an account payee bank demand draft of Rs 600/- for General Candidates and Rs 555/- for SC/ST Candidates. The Demand Draft will be made in favour of "THE COMMANDANT, RIMC FUND", DRAWEE BRANCH, HDFC BANK, BALLUPUR CHOWK, DEHRADUN, (BANK CODE -1399), UTTARAKHAND.
- 5. Application on prescribed form accompanied by 2 passport size photographs, Domicile Certificate, Photocopy of Aadhar Card(both sides), Birth Certificate issued by Municipal Corporation, ST/SC Certificate and Certificate from the Principal of the school in original and photograph on it attested stating date of birth and class studying should be submitted to the Directorate of School Education by 15th Oct 2023.

(THAVASEELAN K)IAS
Principal Director.

Japan-i Fukushima tzü indoker, China-i Japan indang seafood nokdang



Japan north tsütsü Fukushima anünglen nungi tangokba noksa ka nung Fukushima Daiichi nuclear power plant nung radioactive wastewater bendena aliba angur. Tsunami agi raksatsüba Fukushima Daiichi nuclear power plant ketdangsur temi iba tzü ya miim indoker Pacific Ocean nung August 24, 2023 nü nungi indok tenzükogo.

Beijing, Luroi/August 24 (Agencies): Japan nung raksar aliba Fukushima nuclear plant nungi tzü tamajung Pacific Ocean nung inoktsüba asoshi China-i Brehostibarnü aitsü aser ibai kangasa khuret maben pei asoshi kisüing bilema inyakba lir, ta ashi. Japan-i raksar aliba nuclear plant nung tzü tamajung ya mozü amshia müreker Brehostibarnepe nungi tzüyüm nung mesüoktsü tenzük aser parnoki iba tzü nung timtem kecha mali ta ashir, saka China-ibo kanga sashia aitsür.

Iba tzü nung timtem mali ta International Atomic Energy Agency-i ashir, saka Beijing-i Japan indang prefecture ter nungi chiyongtsü bener aruba nokdang aser Hong Kong-ia kasaji inyaker.

Fukushima tzü indokba mechi Chinese customs-i tanü nungi tenzük Japan nungi bener aruba "aquatic products" ajak nokdang, ta ashi.

"Fukushima nungi nuclear tzü tamajung tzüyüm nung indokba ajaga chiyongtsü nung radioactive aliba nungi nokdangtsü mechi, China nung takum kumzükä ayutsü

aser bendanglen nungi bener aruba chiyongtsü tamajung masütsü atema General Administration of Customs ajanga August 24, 2023 nü nungi tenzükä achitsü akoba tzü shiruru densema Japan nungi aquatic product bener aruba anena atar," ta customs ketdangsur temi sangdong ka nung ashi.

Beijing indang foreign ministry ajanga sangdong ka nung ashiba agi, "Tzüyim ya meimchir ajak asoshi lir, aser tashiyim agi Fukushima indang nuclear wastewater tzüyüm nung inoktsüba ya khenyongi khuret mangatetba aser pei agitsü kisüing bilema mapa ka lir aser alimai jangraba ama masü."

Japan-i iba plant mesüra nuclear wastewater purification equipment dak temolung alemtsü tejangja mesayu, ta ashi.

"Tokyo-i nuclear wastewater data tejangja aser shidak ta kuli magütsü aser tzüyüm nung inoktsüba nunga tzüyüm lipajen aser meimchir asoshi timtem mali ta kuli mesayu."

"Japan-i inyakba ya alima

ajunga dangi lendong yokba aser meimchir tarutsü putu dangia timtem tekangshi agütsüba lir," ta sangdong ajanga ashi.

2011 küm menoknok aser tsunami tesashi arua nisung 18,000 shi takum samaba sülen northeastern Japan nung Fukushima-Daiichi facility nung aliba reactors asem yimsa ao.

Iba sülen iba plant operator TEPCO ajanga reactor mokonga akumba mapang tzü tamajung 1.34 million cubic metres bendena lir.

Olympic swimming pool 540 shi asüngtsüba tzü ya küm aika nung indokmatsü aser ano tang tashi lendong aliba tesem decommission atema mera tuluka lir.

"Japan indang Fukushima wastewater ketdangtsütsü ya nuclear security atema tongtipang maparen ka lir, koba ajanga arütsü alema oa linük balala nung kongshitsü," ta Beijing-i sangdong nung shia liasü.

"Pei tejangraba nung Japan-i par linük nung aliba mesüra alima nung aliba nüburtem nem timtem teraka magütsütsüla."

Saudi Arabia, Iran densema linük trok BRICS nung züngsemtsü

Johannesburg, Luroi/August 24 (Agencies): Taruba küm BRICS nung züngsem tasen akumtsü aliba linük trok rongnung Saudi Arabia aser Iran densema lir, ta South Africa Tir Cyril Ramaphosa-i iba senden tatem nü sangdong, koba Western tashi den tokteptsü asoshi tentetba ama züngshir.

Iba telok ya rongsenketzüng tsütsü danga linüktem menepa ainba linük pongu - Brazil, Russia, India, China aser South Africa lir aser parnoki BRICS ulushitsü asoshi tangatetep nung telemtetba ya tan hopta Johannesburg nung anogo asem senden amendang agi, ta Ramaphosa-i Brehostibarnü ashi.

Mezüng phase nung shilem

ka ama Argentina, Egypt, Ethiopia aser United Arab Emirates linüktem ya Saudi Arabia aser Iran den külemi January 2024 nung BRICS züngsem akumtsü. Iba sülen ano danga phases tem anidaktüsü.

"Iba züngsem ulushiba ya otsüsütsü lir," ta China Tir Xi Jinping-i ashi.

"Züngsem timba akumba ya BRICS tesendaktep asoshi mera tasen ka alitsü. Iba yagi BRICS cooperation mechanism tajungba akumtsü aser alima nung yimjung aser terenlok atema tashi itshitsü."

Ethiopia Ato Kilonser Abiy Ahmed-ia par linük asoshi ibai mapang tajung lir, ta tenüngsang agütsü.

"Alima ajungtsü mechi

Ethiopia-i ajak den amalitep akatsü renema lir," ta Abiy-i Twitter (tagbo X ta melener) nung ashi.

BRICS ulushitsü asoshi iba telok nung züngsem linüktem (Brazil, Russia, India, China aser South Africa) küm ka dak tema jembia aru aser senden nung tezüngzüktep ka agiba sülen züngsem tasentem iba senden nung jaoka liasü.

Iba telok ulushiba ya alima nung yimsütsüba tsütsü tashi tuluba akumtsü asoshi sentong aliba nung shilem ka lir aser Global South indang ola ya world agenda nung tiyong kumdahtsür.

Saudi Arabia, UAE, Iran aser Egypt aniokba ya MENA nungi züngsem mezüngpur alitsü aser Argentina anioktsü

MENUNGRA BILEMTETER



Late L. PANGERNOKLU
25.08.2022 to 25.08.2023

Temeim Oba, Iba akümüli nung nai onok toktsür or tanü anogo küm ka ajunger, saka nü temeim ozü molungjang nungi kodanga mainshir.

Tanü na iba lima nung meliaka onoki na kanga dang menungra sarasadema amonger.

~ Nü temeim Kinungtsü, Chirnur,
Semchirsepnur aser Kinungertem.

WOKHA AOR TELUNGJEM TENÜNGSANG AGÜTSÜR

Superintendent of Police, Wokha, **Aotula T. Imchen IPS-i77** buba Independence Day nung Governor's Gold Medal Award 2023 anguba atema Wokha Aor Telungjem (WAT) ajanga tenüngsang agütsür.

Iba sempet yagi lai temolung agüja meranga inyakba kuli sayur. Asen Tsüngremi maneni moajang aser tarutsü anogotem nunga takokba lidakjangma.

Sd/-
Limatangit Lemtur
Vice President, WAT



Sd/-
Imtikumba Jamir
General Secretary, WAT

Ano N.Korea indang spy satellite ka tamakok ajuru



Seoul, Luroi/August 24 (Agencies): North Korea-i military spy satellite ka anünglaki yoktsü merangba

tamakok ajurua tembang, koba tanaben alitsü.

Iba satellite ya Brehostibarnepe khaketa yok, koba hopta tepiyong launch window indang anogo mezüngbuba liasü, saka satellite bena aliba ya rocket stage tasembuba nung timtem ka adoka tamakok ajuru, ta North Korea-i ashi.

Parnoki ano October ita tendangtsü ta shiogo.

"Rocket indang mezüngbuba aser tanabuba stage junga ayim, saka 'third-stage flight' mapang emergency blasting system nung timtem adokba yong tamakok ajuru," ta sorkar meyong KCNA ajanga ashi.

South Korea mitkar temia iba satellite yokba ya Sohae Satellite Launching Station nungi anepdag 3:50 meta lazük aser rocket ya Yellow Sea nung international airspace leni aodang tsüngsü pua liasü, ta ashi.

(Maneni tapak 8 nung...)



August 24, 2023: Baku nung Chess World Cup 2023 final, India nunger asayar GM R Praggnanandhaa aser Norway nunger GM Magnus Carlsen na tsungda tanabuba game nung Azerbaijan nungi tetsür Grandmaster mezüngbula Aynur Sofiyeva-i mezüngbuba move sütsüba noksa nung angur.

Election mapang shidak nung magiba atema WFI suspend sütsüogo

Luroi/August 24, 2023

(Agencies): Election mapang shitak nung magiba atema United World Wrestling (UWW)-i Brehostibarnü Wrestling Federation of India (WFI) suspend sütsüogo. Iba tetezü India nunger asayatem taruba world wrestling championship tem nung linük wako kübok tokteptsü memelatsü.

September 16 nung tenzüka asayatsü aliba Olympic-qualifying world championships nung India nunger wrestler tem 'neutral athletes' ama tokteptsü.

Bhupender Singh Bajwa-i aniba ad-hoc panel nem election ayongzüka agitsü atema anogo 45 atakzüksü aser iba mapang nung parnoki election ayongzüka magitet.

Indian Olympic Association-i ad-hoc panel ya taküm April 27 nü tentetja liasü. UWW-i April 28 nü sangdong ka ajanga election agitsü atema mapang atakzüksüba ama

inyaksangshi mesüra Indian federation ya suspend sütsüta tekümdangtsü metetdaksür liasü.

"UWW-i executive committee election magiba atema Borhbar aonung ad-hoc panel nem WFI suspend sütsüba osang agüja liasü," ta IOA source kati ashi.

Ad-hoc panel züngsem Gian Singh-i PTI dang ashiba agi, iba tatalokba dak sendakba nung Bajwa-i parnok nem osang kecha magütsür aser telemetba balala agiba nung parnoki shilem magi kümogo.

India tetsür team-i tawa Amman nung asayaba U-20 World Championship nung team title benogo, parnok Japan aser USA jakdang tembang aser India wrestling puti otsü nung tang mezüngbuba team title benogo.

Wrestler tem ya parnok linük tenünung nungi asayaba ajanga point nguteta liasü, saka Serbia nung asayatsü

aliba senior world championships nungbo parnok 'neutral athletes' ama asayatsü aser parnoki koma asayatetaka iba ya India tenüng nung masütsü.

Ajisüaka September 23 nü nungi tenzüka Hangzhou nung asayatsü aliba Asian Games nungbo wrestler tem India tenüng nungi asayatsü, kechiyong iba asayamung nung shilem agitsü atema WFI-i masü saka IOA-i asayatem tenüng yokogo.

World championship atemabo trails ajanga team ka shimba sülen WFI-i asayatem tenüng yokaliasü.

WFI election ya May 7 nü agitsü liasü saka Sports Ministry-i iba inyakyim ya magi kümdaksü aser iba sülen IOA-i iba asaya achayangtsü atema ad-hoc panel ka amenokja liasü.

Iba sülen election ya aiben thinena aruogo, kechiyong disaffiliated state bodies temi okadak ken o balala benoka liasü.

Ano N.Korea indang spy satellite...

(Tapak 7 nungi...)

Minute ter shi lir Japan indang southernmost prefecture, Okinawa nung alirtem dang kilong nung atsüksü sangdonga liasü. Iba emergency warning ya minute ana shi lir agien.

Iba rocket teraksa ya kar Pacific nung Philippines anasa tsüka alitsü akok, ta Japanese broadcaster NHK ajanga ashi.

North Korea lenir Kim Jong Un-i linük indang mitkar tajungba kumdahtsü aser nok-nü tasen yanglutsü sentong nung spy satellite ya tongtipang lir.

May ita mezüng yokba satellite ya tamakok nung tembang aser ketdangtsür temi ibai tamakok tulutiba lir ta ashi aser ano merangtsü nangzü.

Television ajanga

osangbener den jembidang tanen makai missile tendangba ya regional security asoshi timtem lir, ta Japanese Chief Cabinet Secretary Hirokazu Matsuno-i ashi.

"Onoki North Korea anema tashi agi nokdaksü aser tematiba jenjang nung aitsür," ta pai ashi.

South Korea indang National Security Council-ia iba rocket anüngleni yoktsü merangba aitsü aser iba yagi United Nations Security Council pangzü nung aibelener, kong Pyongyang-i ballistic missile technology amshiba nokdanga lir.

United States-ia kasaji ashi aser North Korea dang amokmeren maparen nungi pila yimjung asoshi temolung agüja jembishinütsü

ajungshia liasü.

"Space launch vehicles (SLVs) nung inoka aliba technology ya intercontinental ballistic missiles (ICBMs) densema ballistic missiles nung amshia aliba den kasa aser melentepa amshitetsü akok, ta state department indang odongtar kati sangdong ka nung ashi.

Mapang tatsüka lir linük asem indang foreign minister tem phone ajanga jembidang iba asoshi lungjemer tenokdangba kar agütsü asadangtsü molungtepogo, ta South Korea indang foreign ministry ajanga ashi.

South Korea, Japan aser US lenirtem Washington, DC nung ajuruteper anogo ishika lir iba satellite ya anüngleni yoktsü merang.

AFC Champions League nung Neymar India nung asayatsü imlar

Luroi/August 24, 2023

(Agencies): 2023-24 AFC Champions League atema Hilal (Saudi Pro League) pur Group D nung Mumbai City FC den ataba sülen Brazil nunger nungtugu asayar Neymar par club tenüng nungi India nung asayatsü akok.

Mumbai pur Groub D nung FC Nassaji Mazandaran and PFC Navbahor Namangan den ata lir. Iba asayamung atema Breshotibarnü team tem draw süa liasü.

Iba asayamung puti otsü nung Al Hilal pur ya ajak dang takok tajungiba anguba club lir aser parnoki iba asayamung pezüben koker lir.

2022-23 Indian Super League Shield aser Jamshedpur FC den Club Play-off akokba sülen Mumbai City pur iba asayamung group stage atema küm anabuba atonga qualify süogo.

Mumbai pur parnok indang home asayatem Balewadi Sports Complex, Pune nung asayatsü, kechiyong parnok teti asayaba Andheri Sports Complex ya AFC Champions League asaya ayongzüka asayatsü atema tetemsü masü.

September 18 nungi

tenzüksü aliba asayamung atema mapanglem ano tembanga merenem.

Al Hilal SFC-i otsüsütsüsa AFC Champions League pezüben koka lir aser parnok taoba season trok nung pezübenbu final tonga asayaogo. Parnoki tawa Neymar Jr alizükogo, shibai taoba mapang UEFA Champions League amala tongtibang asayamung kokogo aser 2016 Olympics nunga gold medal ngur lir.

Neymar dak alia Al Hilal nung Ruben Neves, Kalidou Koulibaly amala nungtugu asayatem parnok team nung densema lir.

Iran indang 2021-22 Hazfi Cup akokba team FC Nassaji Mazandaran aser 2022 Uzbekistan Super League nung tanabuba jenjang nung tembangba PFC Navbahor Namangan team na taküm mezüngbuba AFC Champions League nung asayatsü.

Asayatem ajak home-and-away round-robin basis nung asayatsü aser telok balala nungi takok angurtem aser tanabuba jenjang nung tembangba team tajungtiba asem Round of 16-i aitsü.

Bernardo Silva-i City den tenangzüktepba yanglushiogo

Luroi/August 24, 2023

(Agencies): Olulu osang aika atokba sülen item osangtem ajak jangjashija Portugal nunger midfielder Bernardo Silva-i Manchester City den tenangzüktepba yanglushiogo aser pa 2026 küm tashi iba club nungi asayatsü.

Silva ya 2017 küm City nung arua aden aser pa team nung kanga tongtibang asayar ka kümogo. Pai tang tashi nung City nungi 308 ben asaya lir aser iba mapang Premier League title pongu, FA Cup ana, League Cup pezü, Community Shield ana aser Champions League ka koka lir.

Silva-i ball kanga junga yanglutsüba dang masü saka goal-a 55 idaktsür lir, kong taoba season Champions League nung Real Madir pur semifinal nung goal 4-0 agi akokba asaya nung mezüngbuba goal ana idaktsüba densema lir.

"Ni Manchester City nungi küm trok jangradema asayaogo aser maneni asayatsü asoshi yongya atar. Taoba season asayamung tongtibang asemprongla akokba ya kanga jangrademtsüka liasü aser

asaya akoktsü tejangraba aliba squad ka nung shilem agitsü ya jangrademtsüka lir," ta Bernardo-i ashi.

"Takok tajung anguba ajanga maneni tako nguner aser iba club yagi takok nguyonga aotsü atema maongka agütsür. Ni manager, teammate aser fan tem ajak meimer aser tarutsü nunga tajangshiba tajung ajangshiyonga aotsü imlar," ta paisa ashi.

Kasa mapang nung Director of football Txiki Begiristain-i ashiba agi, Silva ya alima nung asayar tajungtiba ka kümogo aser arishi küm 29 tain asayar yagi tarutsü nunga club takok nguyonga aoba nung teyari agütsütsü ta amanger.

Kasa mapang nung Bernardo, Portugal tenüng nungai 82 ben asayaogo aser 2019 küm UEFA Nations League akokba team nung pa densema liasü, kong pa nem Player of the Tournament naroküm agütsü.

Barcelona, PSG aser Saudi club temi pa alizüktsü jangraba lemsatepba sülen pa den tenangzüktepba yanglushitsü asoshi sota ata liasü.

BILEMDANGANG

"Pei ashiba metetba teyaksanga sayutsü temereng."